

## **Diprojeke tša Meetse di thakgolwa Mmasepaleng wa Aganang.**

Badudi ba ditikologo tše 4 ka Mmasepaleng wa Aganang ba thabetše go thakgolwa ga diProjeke tša meetse tše di nepilwego go ba imolla morago ga gore ba hloke meetse nako e telele. Badudi ba Ga-Phago, Ga-Kolopo, Ramoshoana le Burgwal ba etetšwe ka sebele ke Meyara Phetiši wa Masepala wa Selete wa Capricorn Cllr Gilbert Kganyago le Meyara wa Aganang Cllr Maria Mokobodi go tsebiša diprotšeke tše semmušo. diprotšeke tše di ka gare ga lenaneo la kabo ya ditirelo tša meetse la Mmasepala la ngwaga wa 2015/16.

Projeke ya Ga-Phago e ya go šomiša diranta tše Dimilione tše 12, gomme e ya go abela malapa a 800 meetse a dipompi tša go tsentšwa ka gae. Badudi ba Ga-Phago ba go feta 30 baya go holega ka go hwetša mešomo ya nakwana nakong ya ge Projeke e thoma. Diprojeke tše ka moka ya Burgwal, Ga-Kolopo le Ramoswana di ya go hlola mešomo ya go feta 120. Go letetšwe gore diprojeke tše di tla gagaba tekano ya dikgwedi tše selelago. Kua Ga-Kolopo ke malapa a 280 ao a yago go lokelelwa meetse ka diranta tše Milione tse 9,3, mola Burgwal le gona ele 280 ka diranta tše 8 . Badudi ba Ga-Ramoswana bona batla hwetša gape le dintlwana tša botswela-mare tša diVIP, Projeke ka moka ya Ga-Ramoswana e bitsa diranta tse dimilione tše 8.

Badudi bao ba bego ba thabile ba re ke kgale ba emetše meetse gomme bjalo ba leboga bobedi Masepala wa Aganang le wa Capricorn ge lehono ba ba gopotšwe. Ba re seo se ba thabišago ka kudu ke gore ba tla hwetša mešomo ya nakwana tekano ya dikgwedi tše selelago. Meyara wa Aganang Maria Mokobodi o re Masepala o tshepišitše badudi gomme bjalo ke nako ya go tliša ditirelo.

“Re kwa re thabile lehono ge re tliša boRakotraka mo setšhabeng gore ba tle ba tsebane le badudi, seo re se holofelago ke gore badudi ba tla šomišana le bona gore go se be titelego ya diprotšeke. Borakotraka ge baka šomišana le badudi re holofela gore diprotšeke di tla fela ka nako yeo e beilwego gomme badudi ba ipshina ka dienywa tša Demokrasi ebago ditirelo”.

O tee wa badudi ba Ga-Kolopo Phineus Molongwane o re bathabile ka kudu kage tlhokego ya meetse e tla ba selo sa maloba. “Re holofela gore diprojeke tše di tla thusa e le ruri ka gore ke kgale re bolawa ke lenyora, re leboga Masepala wa Aganang le wa Capricorn”.

Morena Moqueen Moloto yo ebago mmoleledi wa Moshate wa Moletji o leboga diprojeke tše, gomme o re badudi batla holega.